

“Kastem pasin nogut”.

Sunday, January 29, 2017.

Moning.

Yu save long ol posin pasin samting na ol mejik pasin samting bilong ples. Mi makim ol wanwan na yu tingim:

- Ol kankain mejik pasin bilong putimaut o ol kankain mejik pasin bilong painimaut.
- Ol kankain mejik pasin bilong wokim ol sampela samting.
- Ol kankain pasin bilong opim maus na makim minim bilong wanpela samting.
- Ol kankain pasin posin.
- Ol kankain pasin marila.
- Ol kankain pasin bilong singautim daiman o toktok long daiman o harim tok bilong daiman o bihainim wanpela samting bilong daiman.
- Ol kankain mejik pasin samting bilong haus man.

Orait, nau yumi skelim tingting bilong God long ol dispela samting. Long **Lo 18:9-15** God i mekim sampela toktok long ol lain bilong Em, em ol lain Israel. Klostu God i karim ol i go bilong sindaunim ol long graun bilong ol Kenan na Em i givim toktok long ol pastaim olsem.....

⁹ Na Moses i tok, “Taim yupela kamap long graun BIKPELA, God bilong yupela, i givim yupela, orait yupela no ken i lainim na bihainim ol kankain kastem pasin nogut bilong ol lain manmeri bilong dispela hap. ¹⁰⁻¹¹ Olsem na, wanpela bilong yupela i no ken kukim man pikinini o meri pikinini bilong em bilong wokim ofa. Na wanpela bilong yupela i no ken i bihainim ol kankain mejik pasin bilong putimaut o bihainim ol kankain mejik pasin bilong painimaut o bihainim ol kankain mejik pasin bilong wokim ol sampela samting. Na yupela no ken i bihainim ol kankain pasin bilong opim maus na makim minim bilong wanpela samting, o bihainim ol kankain pasin posin, o bihainim ol kankain pasin marila. Wanpela bilong yupela i no ken i bihainim pasin bilong singautim daiman o toktok long daiman o harim tok bilong daiman o bihainim wanpela samting bilong daiman. ¹² BIKPELA i hetim tru manmeri i bihainim kain pasin olsem. Long dispela as tasol BIKPELA, God bilong yupela, bai rausim i go ol lain manmeri na givim graun bilong ol long yupela. ¹³ Long ai bilong BIKPELA, God bilong yupela, yupela mas i stap manmeri i no gat asua. ¹⁴ Ol lain manmeri yupela bai rausim i go na kisim graun bilong ol, ol i save harim tok bilong ol dispela manmeri i bihainim ol kankain mejik samting bilong opim maus na i bihainim ol kankain posin samting na i bihainim ol kankain samting olsem. Tasol BIKPELA, God bilong yupela, i no orait long yupela i harim tok bilong ol. ¹⁵ BIKPELA, God bilong yupela, bai kamapim wanpela profet long namel long yupela yet na em bai i stap olsem mi. Yupela mas harim tok bilong em.” Lo 18:9-15

Tok bilong God i klia. Yumi skelim 6-pela samting God i putim ples klia:

1. God, long maus bilong Moses, Em i kolim ol kainkain posin samting na ol kainkain mejik samting “kastem pasin nogut”. Ol posin samting na ol mejik samting em i *nogut* samting long ai bilong God na Em i makim na kolim ol dispela samting “kastem pasin nogut”. (Lain 9.)
2. God i tokim ol lain bilong Em long ol i no ken i *lainim* na ol i no ken i *bihainim* “kastem pasin nogut”. Ol i no ken i *lainim* o *bihainim* ol kainkain posin mejik samting. (Lain 9.)
3. God i hetim “kastem pasin nogut” na Em i hetim manmeri i bihainim “kastem pasin nogut”. God i no wanbel liklik long manmeri i pas long ol kainkain posin mejik samting. (Lain 12.)
4. Ol lain bilong God ol i mas i stap longwe tru long “kastem pasin nogut”. Man i stap klostu long ol posin samting na ol mejik samting bilong ples em i gat asua, na lain bilong God i mas i stap manmeri i no gat dispela kain asua i stap long laip na femili bilong ol. (Lain 13.)
5. Ol lain bilong God ol i no ken i harim tok bilong manmeri i bihainim na i pas long “kastem pasin nogut”. God i no orait liklik long ol lain bilong Em i *harim* tok bilong ol. (Lain 14.)
6. Ol lain bilong God ol i mas harim tok bilong ol profet bilong God tasol, em ol man God i makim bilong autim tok bilong God yet. Em olsem na ol i mas harim tok bilong God tasol. (Lain 15.)

Yumi manmeri bilong PNG yumi mas save olsem, ol *kastem pasin nogut* em i no *nupela* samting. Ol kainkain mausman na mejik samting na posin pasin samting na marila pasin samting yumi lukim long ples em i no *nupela* samting. Nogat. Bipo tru ol lain Kenan ol i wokim ol dispela samting. Na ol tumbuna bilong yumi i kisim ol *kastem pasin nogut* we yumi no ken i save. Tasol yumi ken i save olsem, ol i no kisim *nupela* samting i kam long hauslain bilong yumi. Nogat. Ol i kisim ol bipo samting, ol samting i stap longtaim pinis long ol narapela lain manmeri, i kam long hauslain bilong yumi.

Na tok bilong God i klia. Yumi i lain manmeri bilong Em, em yumi i bilipim na trastim feitful wok bilong Jisas na bihainim Em, orait yumi no ken i bihainim ol *kastem pasin nogut* bilong ples. Long wanem, Papa bilong yumi i hetim tru ol *kastem pasin nogut*. Tru, God i mekim ol dispela toktok long ol lain Israel na yumi no lain Israel. Tasol, taim God i tokim ol lain Israel, orait Em i putim tingting bilong Em long ples klia long olgeta manmeri. Olsem na yumi ken i save olsem, God i hetim tru ol *kastem pasin nogut*. Em olsem na yumi i kamap femili bilong God long wok bilong Jisas long diwai kros, orait yumi ken i save olsem, God i laik yumi i stap longwe tru long ol dispela kain samting.

Long **lain 15** BIKPELA i tokaut long wanpela profet bai kamap namel long lain Israel na Em bai i stap olsem God yet. BIKPELA i tokaut long Jisas (yu ken i lukim **Aposel 3:22-23**). Em olsem na yumi i bilipim na trastim feitful wok bilong Jisas, yumi i bilipim na trastim God long kisim bek yumi long feitful wok bilong Jisas, orait yumi mas harim tok bilong Jisas tasol. Yumi bilong Jisas na yumi no bilong ol manmeri bilong ples moa. Jisas Em i BIKPELA bilong yumi, na ol tumbuna nogat.

BIKPELA Jisas bilong yumi i *winim* ol kastem pasin nogut bilong ol tumbuna. BIKPELA Jisas i *winim* ol manmeri bilong ples i bihainim na i toktok planti long ol kastem pasin nogut bilong ol tumbuna.

²¹ God i mekim Krai i stap antap tru long olgeta hetman na long olgeta man i gat namba bilong bosim ol sampela samting na long olgeta gavman na king na long olgeta man i gat nem. Krai i stap antap long olgeta nau na Em bai stap antap long olgeta long bihain taim

tu. ²² God i putim olgeta samting aninit long lek bilong Krai, na Em i mekim Krai i stap het tru bilong olgeta samting..... Efesus 1:21-22.

Jisas i winim ol tumbuna na ol kastem pasin nogut bilong ol. Em olsem na, yumi i pas long Jisas, yumi no ken i pret long ol dispela samting, na yumi no ken i toktok planti long ol dispela samting, na yumi no ken i go insait long kros bilong ol manmeri bilong ples long ol dispela samting. Nogat. Yumi lusim ol dispela samting na yumi pas olgeta long olgeta samting bilong BIKPELA bilong yumi na yumi harim tok bilong Em na bihainim Em wanpela tasol, na maski ol kastem pasin nogut bilong ples.

Glenn.

©2017 J Glenn Calderwood
www.pngbibleresources.org